

近代哲學家

東方文庫第三十八種

書館發行

近代哲學家

目次

馮德之生平及其學說	一
海格爾學說一斑	一七
文得爾班學說	二七
居友傳略	四九
附錄 研究哲學之管見	五七

馮德之生平及其學說

康符著

德人維廉馮德 (Wilhelm Max Wundt)，近代心理學家之巨擘，又哲學界之明星也。以一九二〇年九月一日卒，其生當一八三二年，年八十有九。馮德任教授者數十年，著述浩瀚，海內學子，親聆其講說，讀其書受其感化者，不可以數計。一旦聞耗，哀悼同聲。爰撮舉其生平學說，志景慕焉。

馮德德國巴丁之奈迦勞人，其父牧師也。一八五一年而後，馮德年弱冠，歷遊哈爾茲堡、突賓肯、柏林諸大學，專以研究醫學爲事。時哈爾茲堡有亞爾諾德，以解剖學著，有哈色以病理學聞，馮德躬承厥教，所獲良多。暨遊柏林，更從彌歐拉治生物

學；顧研究之興趣，漸趨注於病理解剖；卒應哈色招，佐其療治。一八五六年，得醫學博士之學位；次年，入哈爾茲堡大學，爲生理學私講師；又次年，撰筋肉運動說，貢獻是年，名家赫謨賀茲，適來大學爲教授，馮德日與近接，蓋隱承其景響者不少焉。初，馮德專攻純粹科學；及是思想漸變，一轉而嚮精神科學之途。是時學界最傾意者，厥在感官知覺之問題，就中尤以視覺爲主，如彌歐拉，蒲爾金，福克曼，好特斯敦諸家，莫不精意研察及之；赫謨賀茲亦著人間視覺論，馮德蓋有激於此，迺以一八六二年，公其感官知覺說，貢獻於世。是書竭四歲之力始成，總論感官知覺諸問題，而於視覺獨詳，居全帙三之二。以撰是書故，始涉獵心理學哲學諸科，於康德，赫爾巴德，雷布尼滋諸家學說，蒐討尤力，能融會其精意，且於空間表象說，既獨據卓見矣。當是時，說空間之知覺者，頗有爭執；彌歐拉宗康德而主先天說，赫謨賀茲則主經驗說，馮德恆思有以調和之。一八五八年，一日，散策深林間，獨行冥思，焉有所悟，以爲人之知有空間者，殆由網膜上之光覺，與由眼球運動而起之筋肉緊張覺，二

者相合，以成斯果。由是潛心闡究，乃折衷先天經驗二說而創爲發生說。向者人皆視空間爲單純性，不可以分析，而馮德竟析之爲光覺，筋肉覺二者，立言新特。且釋之曰：精神中要素，一旦結合，則更生新性質，與本來要素異。此爲精神界所特具之法則，命之曰創造的綜合原理。馮德後年，克自建設心理學之系統者，正以有意證明此理，始矢志斯學爾。又研攻精神現象者，自昔咸用內省法；馮德之研攻感官知覺，獨以實驗法出之。先是翻希奈爾之撰精神物理學原論，亦嘗本實驗之旨，闡說精神過程；顧惟限於刺激與感覺之關係，未及其他。馮德則謂凡究精神現象，匪由斯道，不可以望精確；其創爲實驗心理學而卒底大成者，發軔於此也。

馮德既研究感官知覺，深感其有味，迺推及一切心理問題。一八六三年，復著人類及動物精神之講義，葉數近千，巨帙也。是時馮德於心理學之定界意義，尙未明晰，殆舉經濟學，統計學，社會學，精神發達史，動物心理學，民族心理學，風俗學等等，咸包括是中，且用爲心理學之補助科學也。其感官知覺說貢議中，已於人種學上

觀察，略涉及之；至作講義，迺明示個人心理學與民族心理學之別，揭二者方法之殊。按昌導民族心理學者，先乎馮德有拉察爾斯，史丹達爾兩家。然謂民族之精神生活，不外個人精神之裸露者，語言卽其客觀產物。故由其說，則民族心理學，第個人心理學之應用者耳。馮德謂非其應用，二者俱心理學中之一分門也。民族心理學，以語言，神話，宗教，風俗，習慣等等，爲其研究之資。其研究所獲，固大有裨於個人心理學。然民族之精神生活，自有其法則在，宜網羅社會現象，而分析比較以得之，不可以個人之心理法則相律。必此二者，各能確立固有之法，則然後其心理學之知識，可云完備也。

馮德思想之見於前舉兩書者，至後年著述中，有芟剔者二誼；其一無意識之精神作用是也。夫以爲無意識之態，可得而有，則無數精神現象，自可明切說釋；然此出假定，心理學爲經驗之科學，旣曰無意識，卽不可以入經驗，不得爲斯學之對象；故馮德卒屏去之也。其次則講義之中，尙旁采種種科學爲輔，此於純粹心理學之

疆界究嫌未晰；迨研究精進，益有悟於斯學本分，迺務去其無關重要者。一八七四年撰生理的心理學綱要，其猶用爲補助科學者，僅生理學一門而已。

綱要之作，初僅八百葉許，後迭有增入，及今六易版，得二千五百葉以上。據其說，人之生活過程，本有生理心理兩面；顧非殊其事實者，惟觀察方面之不同則然。誠欲研究人間生活，宜循此途并進；兩者蓋有相助而不可離之關係焉。然生理學之於此，不過供輔佐之用，其究竟所期，乃在闡明心理過程，冠以生理，決非生理學也。時因生理一狀詞，頗召人誤會；馮德初本治生理學者，立言之際，自不免爲生理學所羈束；故其後終不得不舍去此，以完厥純粹心理學之職務也。綱要中所採用者，俱實驗法；此法固爲生理學者所慣用，而馮德卽以移諸心理學，謂二者所研究之事實同，其方法亦宜同；故馮德所云生理的心理學，實卽實驗心理學。後屢改版，所增實驗事項彌多，生理云云，其名焉爾。晚所著他書，皆言實驗心理學，不更以生理爲狀詞矣。

一八七四年，其馮德一生最可紀念之期乎。自獲學位，歷十九載，未有定職，甚鬱鬱不得志。以赫謨賀茲之明，猶不省馮德學識之軼衆，他可勿論。斯亦馮德之務篤實遠馳逐，有以使然也。早歲嘗與瑣斐伊莫女士訂婚約，以急於求學，累於生計，不果娶。是年，始受突利希大學之聘，爲哲學教授；乃與莫女士成婚，相將就任，時年四十有三矣。顧以突利希大學，不願輸資爲實驗室，馮德居之，殊不懌，每思得間引去。次年，值來普的希大學哲學教授闕額，爭之者頗衆，而卒爲馮德所獲，喜過望。嗣是以迄於歿，皆致力於此大學，互三十九年之久也。

馮德之至突利希大學，其就任日講演，以現代哲學之職分爲題，後於來普的希大學，則以哲學對於經驗科學之景響爲題。此二次講演者，標題雖若泛常，然自其思想變遷之跡以觀，所關綦重。是時馮德有志欲取各種經驗科學爲基址，以建設一哲學系統；謂哲學云者，不外取經驗科學所獲之果，綜合之，調和統一之，去其矛盾，以成一整然有系之溥遍性學問。是卽所謂科學之哲學，因於就任講演之際，正

言以申厥志者也。

馮德之前半生，潛修時代也；雖有著作五六，而精力所萃，終在讀書求學之間。及奉職來普的希大學而後，則轉入事業時代矣。長篇巨著，多至數千若數百葉者，遞年出版，而短篇論文，亦無間發表；讀者駭愕，謂非才識豐，精力足，又持以恆心者，不克臻此。且其事業，匪惟於著述也；教授之餘，旁事實驗，蒞任未幾，即有設立心理實驗室之議。一八七六年，薩克森政府允爲之特闢一室；而恆用不供，馮德傾私帑以維之。居亡何，令聞騰起，不獨國中學子，爭來問業，遠如美、英、法、義、俄，及斯幹狄那維亞、保加利亞、塞爾維亞諸邦，多有成學之士，來執贄其門，聚合於實驗室中者；人種之殊，語言之麗雜，有世界團體之目。其實驗所，次第擴充，今爲室得十有五，設置器械，亦益完美。一八八四年，始創刊一雜誌，顏曰哲學研究，以公表其實驗所得；迨一九〇五年，更名為心理研究，迄今猶發行云。

馮德之教授於大學，不獨以心理專家，旁至論理學、倫理學、純正哲學，及哲學史，

亦輪講及之。每臨講，聽者輒報滿。蓋思集合經驗科學之果，以自組哲學體系，時方從事於此也。故是間所著述，多屬此類。先成者爲論理學，嘗病亞里士多德以來之形式論理，奄無生氣，辟如陳骸。一八八〇年起意更體裁爲之，四閱寒暑而脫稿。初分二卷，及三易版，改爲三卷，都可二千五百葉。首卷前半，力數舊論理學之失，後半則闡發認識論。次卷先述純粹科學之溥通方法；其第二章述數學原理，以爲數學者，純爲形式科學，而一切自然科學之基也；第三章述自然科學之原理及方法；末章更就理化生物學之原理精論之。至第三卷，首述精神科學之方法及心理學原理；次章以下，則取言語，歷史，社會，國家經濟，法律諸學，而一一推闡其原理焉。次則爲倫理學，自其蓄意研究民族心理以來，卽著目於道德生活之現象，以研究此事，爲斯學應有義也；病向之治倫理者，偏重演譯，迺一反其道，以歸納法行之，謂倫理學入手處，卽在民族心理學，宜就社會道德之客觀現象，用心理法則，析之衡之，以爲倫理學建設根本原理。是書刊於一八八六年，初二卷，及三改版，分爲三卷，約二

千葉卷帙之鉅與論理學相頡頏。首卷敘道德生活之事實，次卷評隲古今倫理學說，末卷則討論斯學之根本原理者也。

於是馮德以心理學之知識，合諸論理、倫理二書所得，而統一之組織之，以成哲學體系一書。其出版在一八八九年，可七百葉許，書不甚巨，而其平生著作中，以是爲至可寶貴。闕馮德學問之真髓者，恃此。其書初出，歐美學人爭月旦焉。書爲六篇：第一二篇論思維與認識；第三四篇論悟性概念與超越觀念；前者說人間知識之何自而成，後者說所以整理知識之方，視爲普遍原理論可也；其五六兩篇論精神哲學及自然哲學，蓋以普遍原理適用於各科學原理之間者。

自哲學體系成，而馮德之學說全體已備；後有所爲，則第彌補罅隙，刪潤枝葉而已。以曩所著生理的心理學，失於繁重，不便讀者，乃約之爲心理學概論，以一八九六年刊布之。前書以生理學爲補助科學；至概論中，則已削除實驗之器械方法，亦從省，第純敘其研究之果，推闡精神過程之發生變化，由之以確定心理學原理及

法則而已。其組織之秩然不紊，與哲學體系一書，并號名著。迄今易版者十餘次也。

馮德於茲，尙有一未償之志，夙謂個人心理學與民族心理學，并爲心理學之二大綱領；然合斯二者，組成一系，厥業維艱。其心理學概論中，雖於民族精神之事，多所論列，然畢竟以研究個人意識爲主，仍是個人心理學也。故晚歲事業，全在蒐羅民族心理之資料，按系統而攻理。一九〇〇年以還，卽有民族心理學之刊；嗣是次第分卷出版，二十年中，爲之執管弗輟。第一二卷，乃從心理學見地，以考察語言之起原及變遷者；三卷以下，曰美術，曰神話及宗教，直至其易簣之歲，始以文化及歷史一卷，完其偉業焉。是書包羅之廣，攻討之勤，得未曾有；度置案頭，不止盈尺也。馮德又以是書涉論泛博，匪更卽民族之精神生活，察其變遷發達，又用提綱挈領之旨，約而出之，未足當於系統科學之目。爰於一九一二年，復有民族心理學原論之作；斯則從歷史之見地，以簡括爲主者也。首章叙原始人民之精神生活，次章敘圖騰時代，三章序英雄時代神話時代之精神生活，末章則就人文之發達論之。以上

所舉特其著書中主要者；即此足覘其思想發達之崖畧。顧所爲不止此，繼此出版者，若哲學概論，若論文集，短篇集，若演說集，若心理學入門，若民族心理學問題，若力學的自然科學原理，若可感界與超感界，又十餘種，不克備列。以垂老之年，而矻矻著作如此，其效忠於學，豈尋恆人所能望耶？

馮德爲人篤實，與人和易可親，而律己至峻。每日治事有常，守時不爽分秒，人以此之康德焉。至講堂，即戒鍵戶，遲至者勿得入，其重法則然也。貌似悴弱，而留意衛生，克享大年，人所弗料。夫人先以一九一二年卒，遺一子二女；其子曰馬克馮德，任斯脫拉堡大學講師，以撰希臘倫理史著聞；長女早夭，次女伊略諾立，亦學問優長。馮德之撰民族心理學，其蒐輯神話宗教材料，得女之力爲多。

馮德之爲書亦如其爲人，能切實按理，讀者雖無拊案叫絕之感，而觀其引據翔確，心自信服焉。短之者或言其冗複而多矛盾，然其反覆申述者，匪關鍵忘，以同彙之著泰多，勢有所不免。其有矛盾，則以立足不同見地不同之故；即如其心理學說，

見諸哲學書者，與見諸心理者，立言攸殊，術語亦異；此無他，一爲哲學，一爲經驗心理學，固不可以無差別也。或又病其範圍過濫，一書之內，殆兼諸科學識而具之，有類百科全書；然卽此正可覘其學識之博。又每論一題，輒舉從來學說，評隲其得失，而於評隲中隱然導出其獨得之見，此尤可覘其擅長論理，雖泛徵廣引，而排比材質，終始釐然有序。此詎編纂百科全書者所可同日語耶？更有說者，其書難讀，馮德聲譽雖隆而讀其書者較罕，不似布格遜、郁根輩之作，所至見賞者以此。難讀之故，不惟關乎行文，亦由見聞淵博，多用各科學專門語，非已有其知識者，苦難索解。又記一義而已，詳之於彼者，卽略之於此，自非窺厥全豹，且一斑之不知。此研究馮德學說之所以綦難，而其得失所在，尤非可輕下斷語者也。今之所謂新心理學，非無對馮德而加之矢者，而窮其淵源，大抵出自馮德。譬諸治宮室然，實驗心理學之基址，已由馮德一手築成之，餘子者，但言此宜闢窗，或言此宜塞戶，用其一節，俱得成家，則其學之閎深博大，爲何如也。教授毛曼嘗稱揚馮德之學，謂其組織嚴整，似近

代之赫格爾，其學識駭洽，似上古之亞里士多德，知言哉！

馮德之於哲學，無一定師承；蓋以意本論爲主者。然能自成一家言，與叔本華所說殊軌。後於心理書中，說統覺處，亦推哲學之理論，以彌實驗心理學之闕。是畢竟意本論之心理學也。其哲學之立足地，可云唯心論，而頗取實在論者之態度；或目爲唯心派之實在論，似亦適切。哲學家之受影響於馮德者，有亞斯烈爾，利浦斯，鮑爾善之徒，而鮑爾善爲尤。鮑氏之書，信馮德之精於自然科學，數數引其言也。

附馮德所著書目

1. Beiträge zur Lehre von der Muskelbewegung, 1858.
2. Beiträge zur Theorie der Sinneswahrnehmung, 1862.
3. Vorlesungen über die Menschen- und Tierseele, 1863.
4. Lehrbuch der Physiologie, 1864.
5. Die physikalischen Axiome, 1866.

6. Handbuch der medicinischen Physik, 1867.
7. Untersuchungen zur Mechanik der Nerven und Nervencentren, 1871-1876.
8. Grundzüge der physiologischen Psychologie, 1873-1874.
9. Ueber die Aufgabe der Philosophie in der Gegenwart, (Rede) 1874.
10. Der Einfluss der Philosophie auf die Erfahrungswissenschaften, (Rede) 1876.
11. Logik, 1880-1883.
12. Essays, 1885.
13. Ethik, 1886.
14. Zur Moral der literarischen Kritik, 1887.
15. System der Philosophie, 1889.
16. Hypnotismus und Suggestion, 1892.
17. Grundriss der Psychologie, 1896.